

इवनिंग डोगरी न्यूज़ बुलेटिन

समे .18:15 Hrs

<><><><><><>

## Headlines

1. लेफ्टिनेंट गवर्नर मनोज सिन्हा होरें आखेआ ऐ जे जम्मू-कश्मीर दा विकास सिद्धे तौर पर साढे नौजवानें दे कन्नै जुड़े दा ऐ।
2. जंगलात मंत्री जावेद राणा होरें रजौरी च शाचेरा कन्ज़रवेशन रिजर्व च जंगली जनौरें लेई नमें विकसित कीते गेदे एन्कलोज़र दा अज्ज उद्घाटन कीता।
3. जम्मू-कश्मीर सरकारै ऐलान कीता ऐ जे प्रदेश च औंदी 27 अक्तूबर शा लेइयै 2 नवम्बर तोहड़ी सतर्कता जागरूकता सप्ताह मनाया जाह्ग ते एहदा विशे-सार होग : सतर्कता-साढी सांझी जिम्मेदारी।
4. स्कूली शिक्षा निदेशालय जम्मू आसेआ जारी हुक्मै मूजब, कल 6 ते अत्तरूं 7 अक्तूबर बी भारी बरखा दी भविक्खवाणी दे मद्देनज़र जम्मू संभाग च सबनें स्कूलें गी बंद रक्खेआ जाह्ग।
5. अज्ज स'झां थमां लेइयै औंदी 7 अक्तूबर तगर समूलचे जम्मू-कश्मीर च भारी बरखा ते बर्फबारी दी मौसम विभाग दी चेतावनी गी दिक्खदे होई जम्मू-कश्मीर दा प्रशासन, हाईअलर्ट पर ऐ।

<><><><><><>

## LG-Youth

लेफ्टिनेंट गवर्नर मनोज सिन्हा होरें मनुक्खी दमाग गी जीवन दा सबनें शा बड्डा चमत्कार करार दि'दे होई आखेआ ऐ जे जम्मू-कश्मीर दे विकास दा भविक्ख, सिद्धे तौरा पर साढे नौजवानें दे सशक्तिकरण ते रचनात्मकता कन्नै जुड़े दा ऐ। अज्ज इक किट्टु अगगे भाशण दि'दे होई एलजी होरें आखेआ जे जम्मू-कश्मीर दा विकास सिद्धा युवा शक्ति दे कन्नै जुड़े दा ऐ इसकरियै असें'गी किट्टे रलियै इक ऐसे वातावरण दा निर्माण करना होग जेहड़ा इ'नें नौजवानें गी नमियां काहड़ां कडुने आहलें, समस्याएं दे हल तुप्पने आहले ते भविक्ख दे नेताएं दे तौर पर तैयार करी सकने लेई मुआफक होऐ। मनुक्खी समझ दी ताकत उप्पर लोऽ पांदे होई एलजी सिन्हा होरें आखेआ जे जेहड़ा बच्चा, लौहकी उम्री च गै जमा, बाकी ते तकसीम ज्नेहा स्हाब-कताब करना सिक्खी लैदा ऐ ओहदे अंदर अगगे चलियै फैसले लैने दी जबरदस्त समर्थ ते जीवन दे शैल हुनर विकसित होंदे ना। एलजी सिन्हा होरें आखेआ

<><><><><><>

## Rana- Carnivore Enclosure

जम्मू-कश्मीर च जंगली जनौरें दे संरक्षण सरबंधी जतनें गी होर बल देने दे मकसद कन्नै जंगलात ते पर्यावरण मंत्री जावेद अहमद राणा होरें रजौरी च शाचेरा कन्ज़रवेशन रिजर्व च जंगली जनौरें लेई नमें विकसित कीते गेदे एन्कलोज़र दा अज्ज उद्घाटन कीता। जम्मू-कश्मीर च जंदी 2 थमां 8 अक्तूबर तगर मनाए जा'रदे वन्यजीवें सरबंधी हफ्ते दे जश्न दे इक हिस्से दे तौर उप्पर एहू गैंह पुट्टी गई ऐ। जंगली जनौरें लेई नमें विकसित कीते गेदे इस एन्कलोज़र दे उद्घाटन कन्ने, जम्मू-कश्मीर च संरक्षित इलाकें गी तगड़ा बनाने ते खतरे च पेदिएं प्रजातिएं दे लम्मी अवधि आहले कल्याण लेई टकोहदी स्थूलतां विकसित करने दे जतनें गी होर बल मिलोग।

<><><><><><>

## Vigilance Week

जम्मू-कश्मीर सरकारै ऐलान कीता ऐ जे प्रदेश च औंदी 27 अक्तूबर शा लेइयै 2 नवम्बर तोहड़ी सतर्कता जागरूकता सप्ताह मनाया जाहग ते एहदा विशे-सार होग : सतर्कता-साढ़ी सांझी जिम्मेदारी। आकाशवाणी दे जम्मू संवाददाता दी रिपोर्ट मूजब, इस हफ्ते दी शुरुआत 27 अक्तूबर गी दिनै 11 बजे एकता संगंध दे कन्नै होग। केन्द्री सतर्कता आयोग दे दिशा-निर्देशें मूजब, सबनें सरकारी मैहकमें, सार्वजनिक खेत्तर दे उपक्रमें, खुदमुख्तयार संगठनें ते होरनें संगठनें दे अधिकारिणें ते अमले आसेआ एहू संगंध चुक्की जाहग। सतर्कता जागरूकता सप्ताह दे दुरान केई सारी गतिविधियां करोआने दा लक्ष्य मित्येआ गेदा ऐ जिं'दे च जागरूकता कैपें, ग्राम सभाएं, कार्यशालाएं ते शकैतें दे नबेडे आहले कैपें दे आयोजन वगैरा शामिल न। एहदा मकसद कम्मैकार्ज च पारदर्शिता ते जोआबदेही गी बढ़ावा देना ऐ।

<><><><><><>

## Couth-Syrup

द'उं ब'रें शा लौहकी उम्मी दे न्यानें गी खंग ते ज़काम दी दवाई नेई देने मतल्लक केन्द्री सेहत मंत्रालय दी सलाहू दे मद्देनज़र किशतवाड़ दे प्रभारी सीएमओ युद्धवीर कोतवाल होरें सबनें सेहत बर्करें ते निजी तौर पर सेवां देआ करदे डाक्टरें गी निर्देश दित्ते न जे ओहू इस हुकमै दी सख्ती कन्नै पालमा जकीनी बनान। उ'नें चेतावनी दिं'दे होई इब्बी आखेआ ऐ कि जेगर इस हुकमै दी उल्लंघना कीती गई तां इसी मेडिकल लापरवाही मन्नदे होई सख्त कार्रवाई जकीनी बनाई जाहग। इस सरबंधै च आकाशवाणी समाचार कन्नै गल्ल करदे होई प्रभारी सीएमओ युद्धवीर कोतवाल होरें आखेआ

<><><><><><>

## Prog. Announcement

आकाशवाणी जम्मू दा क्षेत्रीय समाचार एकांश अपना माहवार चर्चा कार्यक्रम लेइऐ आवा'रदा ऐ। 15 मिनटें दे इस कार्यक्रम दा विशे ऐ-महिला सशक्तिकरण ते मानसिक स्वास्थ्य। इस कार्यक्रम गी तुन 6 अक्तूबर सोमवारें

बहुलै 8 बज्जिए 45 मिनटें पर सुनी सकदे ओ। इस प्रसारण च स्थाढी परौहिनयां होडन मन्नी परमन्नी दियां मनोवैज्ञानिक ते मानसिक स्वास्थ्य विशेषज्ञ अभिनंदनी पंडित होग जेहिडियां विशे पर अपने बिचार ते तजुर्बा सांझा करडन। इस कार्यक्रम दी मेजबानी स्थाढे विजय बजाज होर करडन। आकाशवाणी समाचार जम्मू कन्नै जुडिए रवो ते सुनदे रवो असेंगी इस्सै चैनल मीडियम वेव 303 मीटर यानी 990 किलोहर्टस ते FM 100 इशारिया 3 मैगाहर्टस पर।

<><><><><><>

## **Schools-Closed**

स्कूली शिक्षा जम्मू दे निदेशालय नै पूरे जम्मू खित्ते च सारे निजी ते सरकारी स्कूल दिनें आस्तै बंद रखने दा आदेश जारी कीता ऐ। एहू फैसला भारी बरखें दी चेतावनी गी दिखदे होई लैता गेआ ऐ। स्कूली शिक्षा विभाग जम्मू दे निदेशक डॉ. नसीम जवेद चौधरी होरें आखेआ ऐ जे आदेश भारती मौसम विभाग आसेआ जारी मौसम सरबन्धी सलाह दी पालमा च जारी कीता गेआ ऐ जेदे मताबक खित्ते दे किश हिस्सें च मती थमां खरी मती बरखा पौने दी पेशगोई कीती गेई ऐ। आदेश मताबक छात्रें ते शिक्षकें दी सुरक्षा गी पक्का करने आस्तै सोमवारें ते मंगलवारें जम्मू संभाग दे सारे सरकारी ते निजी स्कूल बंद रौहडन। मौसम दे हालात मताबक अग्रे दी जानकारी दिती जाग।

<><><><><><>

## **UIDAI**

भारती विशिष्ट पंछान प्राधिकरण (UIDAI) नै 5 थमां 17 बरें दे बच्चें आस्तै आधार बायोमेट्रिक अपडेट गी मुफ्त करी दित्ता ऐ। इक बयान च इलैक्ट्रनिक ते सूचना तकनीक मंत्रालय नै आखेआ ऐ जे इस उम्री दे बच्चें आस्तै जरूरी बायोमीट्रिक अपडेट पर दित्ती गेदी छूट 1 अक्तूबर थमां लागू होई चुकी दी ऐ ते 1 साल तोड़ी एहू लाहू मिलोग। इस फैसले कन्नै पूरे देश च तकरीबन 6 करोड़ बच्चें गी फायदा होग।

<><><><><><>

## **GST Reforms HP**

हिमाचल प्रदेश दे नमें जीएसटी सुधारें, कारीगरें, करसानें ते औद्योगिक क्षेत्र गी खरी मती राहत दित्ती ऐ। नमें जीएसटी कीमतें स्थाबै हत्थ कन्नै बुने दे शालें, रिवायती हिमाचली टोपिएं ते दुई दस्तकारी कन्नै तैयार कीती गेदी चीजें पर जीएसटी घटिए 5 फीसदी होई गेआ ऐ जेड़ा गै पहले 12 फीसदी हा। इस्सै तरीके पुराने जमाने थमां इस्तेमाल होआ'रदे चमड़े दी चप्पलां, लकड़ी दा सजावटी समान, मिट्टी ते धातु कन्नै बनी दी नेकें चीजें गी बी 5 फीसदी जीएसटी स्लैब हेठ आंदा गेआ ऐ। शिमला ते कन्नै लगदे जिलें दे सेब उगाने आहले करसानें गी बी पैकेजिंग लेई इस्तेमाल होने आहले समान पर जीएसटी घटने पर फायदा होग जेदे कन्नै कीमत घट्ट होई जाग ते ज्हारें बदे करसानें गी लाहू थ्होग।

<><><><><><>

## Weather-High Alert

अज्ज स'झां थमां लेइयै औंदी 7 अक्तूबर तगर समूलचे जम्मू-कश्मीर च भारी बरखा ते बर्फबारी दी मौसम विभाग आसेआ दिती गेदी चेतावनी गी दिक्खदे होई जम्मू-कश्मीर दा प्रशासन, हाईअलर्ट पर ऐ। आकाशवाणी दे जम्मू संवाददाता दी रिपोर्ट मूजब, मुकामी मौसम विभाग ने आखेआ ऐ जे पच्छमी ब्हाएं च खौदल करी जम्मू ते कश्मीर, दौनें गै खित्ते च मौसम खराब रौहग ते इस दरान उच्चिएं धारें पर दरम्याने थमां भारी दर्जे दी बर्फबारी सने जम्मू खित्ते दे इलाकें च भारी थमां बड़ी भारी बरखा दे असार दस्से गे न। कश्मीर घाटी च जेहडे इलाके इस दरान सबनें शा मते प्रभावत रेई सकदे न उं'दे च अनंतनाग, पहलगाम, कुलगाम, सिन्थन पास, शोपियां, पीर की गली, सोनामर्ग-ज़ोजिला, बांडीपोरा-राज़दान पास, गुलमर्ग ते कुपवाड़ा-सिन्थन पास दे इलाके शामिल न ते इ'नें इलाकें च इस दरान भारी बर्फबारी दे असार दस्से गे न।

<><><><><><>

## Rain-Samba

अज्ज बडुलै साम्बा जिले च शुरू होई दी भारी बरखा ते अंधी झक्खड़ नै तैयार फसल गी नुकसान पुजाया ऐ। बगैर मौसम दे बरखा ते तेज अंधी झक्खड़ कारण फसलां बिशी गेइयां न जेदे कारण करसानें गी खासा नुकसान होआ ऐ। एहदे कन्नै जिले दे बन्ने कन्ने लगदे इलाकें जियां रामगढ़, साम्बा ते राजपुर च बड़ा नुकसान होआ ऐ। मती जानकारी दिंदे होई साम्बा थमां स्हाढे संवाददाता सतपाल शर्मा होरें आखेआ।

<><><><><><>

## Skill Development Ramban

कौशल विकास विभाग रामबन दे निदेशालय ने क्षेत्र च कौशल विकास कार्यक्रमें दा सरिस्ता कीता ते उन्दे पर तक्क बी रक्खी। इनें कार्यक्रमें दा मकसद राश्ट्री स्कीमां जियां पी.एम.के.वी.वाई ते दस्तकारी लेई प्रशिक्षण स्कीम ते औद्योगिक प्रशिक्षण संस्थानें दे प्रबंधन गी लागू करना ऐ तां जे व्यवसायिक प्रशिक्षण ते रोजगार गी बढ़ावा थहोई सकै। औद्योगिक प्रशिक्षण संस्थान रामबन हुनर आधारित शिक्षा तकनीकी कम्में लेई प्रदान करा'रदा ऐ तां जे औद्योगिक ते सेवाएं दी जरूरतें गी पूरा कीता जाई सकै।

<><><><><><>

---